



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7



Neeraj Chopra Federation Cup
nung asayatsü jangjaogo

AstraZeneca-i EU nungi
COVID vaccine agiener



VOL. XXI ISSUE NO. 206 (ADOK 206) DIMAPUR YANGTEPNÜ (THURSDAY) MONUPII (MAY) 09, 2024 ₹ 5.00

Foothills Road mapa ochishia inyaktsüla: NFHRCC

Dimapur, Monupii/May 08 (TYO): Tang teyangludak 2 lane Foothill Road atema contractor tem shimba nung Nagaland Foothill Road Coordination Committee (NFHRCC) ajanga Chief Engineer, PWD, R&B, Government of Nagaland nem tezüluba ka agüja liasü.

NFHRCC ajanga ashiba agi, qualified registered contractors kanga kumdanga shimtsüla, Naga nunger contractors lanurtem nema maongka agütsüla, ajungkettsüla aser parnok sempet amshitsüla, ta ashi. Mapa lemsaba nung contractor shia lenmang ya kilometre 10 nungi 15 tashi dang agütsüla, ta ashi.

Contractor ka nem contract

mapa tesem ka dak tali melemzüksütsü/magütsütsüla, aser prescribed SOR tsünglanglen apply süa alir nem contract mapa magütsütsüla mesüra timba agi shilem 5 tashi dang asütsüla, ta NFHRCC ajanga ashi.

Lemzüksüba mapa tem mapang shidak nung aser tajungtiba nung renemtsü mechi Department, Contractors aser NFHRCC tsüngta tripartite agreement züluteptsüla.

Division ajak nung approve süa aliba CE Testing Co Ltd alignments ama shidak inyaktsüla aser division shia shidakba technical DPR nung ajemdaker senotsü kasa aser timi lemstütsüla, ta NFHRCC ajangasa ashi.

Akitovillage nung tetsür tasümang kangutet

Dimapur, Monupii/May 08 (TYO): Mejangjaba tetsür tasümang ka Akitovillage, Niuland nung nguteta lir ta May 8, 2024 anepdang 10:30 ako meta Office-in-Charge, Niuland Police Station nungi telephone ajanga osang ka arua liasü.

Iba osang aruba nung ajemdaker P.S. duty party pur iba tasümang aliba tesem bushia ao aser iba yimtsüng indang GB lia tasümang ya bushisüngdanga liasü, ta Dimapur Police ajanga sangdong ka nung ashi.

Ozüng agi melaba maparen ajak tembangba sülen tasümang ya post-mortem examination

aser jangjatetsü atema District Hospital Dimapur morgue nung yua lir.

Iba nisung ya t-shirt sentsü tanen aser tula nung temesüng agi 'Shiv Ganga Hardware Dimapur' ta zülur sema liasü. La ya sentsü tanen tentangpusa track pant, double strap slide sandal (Flite) nung sole sentsü temesüng aser tamak aser beads necklace sentsü temeyoktep agir liasü.

Kibur/kinunger/tembar temi Officer-in-Charge, Women Police Station, Dimapur den Mobile No. 7085055027 ajanga tongteprateptsü akok, ta sangdong ajangasa ashi.

Suzuki-i Kohima nung tesem balala semdang



Dimapur, Monupii/May 08 (TYO): Ambassador of Japan to India, Hiroshi Suzuki-i May 8, 2024 nü Kohima jila kübok tongtipang tesem balala semdanga liasü.

Pai Naga Heritage Village Kisama, Kohima nung World War II Museum semdang aser iba mapang World War II mapang Battle of Kohima nung Japan-i shilem agiba indang pa dang tongmelang agi rasaa ashi.

Museum nung artifacts aser noksa yua aliba nua Ambassador Suzuki temulung süa liasü. Paisa yangji Battle of Kohima nung atalokba documentary video ka reprang aser iba sülen Heritage Bamboo Hall nung Nagaland nungi entrepreneurs aser ketdangsurtem den külemi chiyonga liasü.

Iba sülen Ambassador of

Japan to India, Suzuki-i Kohima War Cemetery semdanga liasü, kong pa meina Chief Minister Neiphiu Rio aser tongtipang nisungtem ao.

Iba mapang Suzuki aser CM Rio nati rara nung asür nem akhum agüja naru yutsü aser ambassador den Japanese delegation temi Kohima Cathedral semdanga liasü.

World War II mapang Battle of Kohima nung asürtem tenüng nung kinunger temi iba Cathedral yangluba nung senotsü teyari agüja liasü.

Maneni pai Kohima village semdang, kong akhi yimya nung sü atakba sayu aser kenten menü balala sayua liasü.

Angami nungeri kanga junga anepaluba aser tanü tashi tembar ama tesendaktep tajung aliba atema pai pelaba lemsatepa liasü.

Kohima Peace Memorial and Eco-Park semzükogo



Kohima nung May 8, 2024 nü Kohima Peace Memorial and Eco-Park semzükba sentong nung tangokba noksa nung Ambassador of Japan to India Suzuki Hiroshi aser Nagaland Chief Minister Neiphiu Rio den ketdangsurtem angur.

Kohima, Monupii/May 08 (TYO): Kohima Peace Memorial and Eco-Park indang soft inauguration sentong ka Kohima nung May 8, 2024 nü agiogo, kong tetoshi tesemdanger ama Ambassador of Japan to India Suzuki Hiroshi dena liasü.

Küm 80 jakdang Japan sepai aser British Commonwealth Forces tsüngta khathepa mapang Naga nunger takum samaba atema Suzuki Hiroshi-i asükhu aser aria bilemstüba lemsatepa liasü.

Naga nunger iba rara den sendaka meliaka timtem jenti ajurutsüsa akum aser aika takum sama aser aika pei li nungi jena aotsüsa akum, ta pai ashi.

Kohima Peace Memorial semzükba nung shilem agitetba atema kanga pelar aser iba monument ya ajanga asenoki tongpang nung asürtem asoshi sarsademsüteter, ta ashi.

Kohima-Japan Bone collection team pelashishia agizüka yaritepba ajanga taoba mapang sepai aser parnok kinunger temi tongpang nung asüba sepai indang teret bendenba maparen inyaktet, ta pai ashi.

Iba Eco-Park ya Nagaland

Forest Management Project nung shilem ka ama Japan sorkar nungi Official Development Assistance (ODA) ajanga yanglutsü, ta pai ashi.

Kohima nung peace memorial mesoba atema Chief Minister Neiphiu Rio aser Nagaland nung aliba nüburtem dang kanga pelar aser iba memorial ya ajanga Japan nungeri Kohima semdangtsü imlar, ta paisa ashi.

"Tasümang teret bendenba nungi Japan aser Nagaland tsüngta tesendaktep yangertetba ya tarutsü nunga Eco-Park yangluba aser lanurtem tsüngta shisa lemsatepa tashi itshitsü aser India aser Japan tsüngta apu tasen ka asütsü teimla lir," ta Suzuki Hiroshi-i ashi.

Iba sentong nung Chief Minister, Neiphiu Rio-i jembidang, iba sentong ya ajanga Naga-Japan partnership nung tongtipang alizüng ka tongteta otsü tasen tenzüker, koba rara tenzüker saka tanübo yimjung osang sangdonger akumtsü, ta ashi.

Japan nunger dak temulungtetba, industriousness aser bendanga agütsür meranga

inyakba shisatsü aser yimya aliba pai sakloker ta ashi.

Küm 50 shi jakdang Japan Association for the recovery and Repatriation of war casualties ajanga Nagaland aser Japan sendaktepa akum aser tanü tashi parnoki maparen balala inyaker aser iba yongji tanüa forestry aser medical sectors nung Externally Aided Projects ana tang teinyakdak lir, ta CM Rio-i ashi.

Kohima Peace Memorial semzükba aser Foundation Stone azüngba ajanga Naga nungeri Japan aser Nagaland tsüngta tesendaktep tali tashi taitba kumdaktsütsü asoshi jangraba aser meranga inyakba sayur, ta pai ashi.

Iba sentong nung Minister, Environment, Forest and Climate Change and Village Guards, C. L. John-i Japan aser Delhi nungi iba sentong nung adeni arurtem dang pelaba lemsatepa liasü.

Iba sentong nung Chief Secretary Nagaland J. Alam, IAS menden liasü aser Commissioner & Secretary, Environment, Forest & Climate Change Y. Kikheto Sema, IAS ajanga melepzüng o jembia liasü.

Kohima nung World Red Cross Day amung

Dimapur, Monupii/May 08 (TYO): Indian Red Cross Society Nagaland State Branch (IRCSNB) ajanga World Red Cross Day amung, kong Member of Initiatives of Change (India) Niketu Iralu tesemdanger tongti liasü.

Iba anogomung ya Red Cross tenzüksang Jean Henry Dunant sor küm 196 ajungba nungtem nung May 8, 2024 nü 'Keeping Humanity Alive' omen nung ajemdaker Conference Hall Red Cross, Kohima nung munga liasü.

Iba sentong nung jembidang, Iralu-i alima nung Red Cross Society indang omen ya "Humanity to peace" lir ta ashi.

Takzütetsü makokba aser lendong timtem tali akumba 2024 küm asoshi omen ya "Keeping Humanity Alive" ta sangdong, ta pai ashi.

Omen anaprong nung alima meimchir ajak adener, aser yimjung tesunep ajangteta meimchir tepsetba ajanga anendakja humanity takum yutsür,

ta pai ashi.

Alima ajanga nung timtem khuret angatetsü tangsa nungdaker ta asenoki angatetsüla aser Henry Dunant masüdag pa anguba nungdakba ngutetsü asoshi asenok taroktibai aitsü nungdaker, ta Nikatu-i ashi.

Temang nung timtemba aser ali rongsen raksatsüba mapang yaritepba kisüng masü Red Cross Movement ajanga yirur alirtem, tesempatep adoka aliba, tetsübo, pei agitsü atema dang bilemba aser tashi aginüba nungi taneptsü angutsü nungdaker, ta pai ashi.

Linük nung nütsüng yongsük zünba, tzü-mopung melenshiba, rongsen agimaba ajanga lendong timtem tali akumer, ta Iralu-i ashi.

Asenoki asen teinyaktsü mapa magizüketra, asen sasa yangluba black hole telungi asenok aier, ta pai ashi.

R. Rose Chakesang MC Member IRCSN ajanga iba omen nung ajemdaker jembidang Humanity tang tashi takum lir, anungji kati ka meimtsüla aser

nungdakbapur yaritsüla, ta ashi.

General Secretary IRCSN Akhale V Khamo ajanga International Red Cross tenzüksang Jean Henry Dunant indang takum otsü tongmelang agi rateta ashi aser laisa Nagaland Angh La Ganesan aser Chief Minister, aser Indian Red Cross, New Delhi nungi salem o shiokba zünga liasü.

Iba sentong nung Founder of Nagaland State Red Cross Society, Khyomo Lotha, taoba minister Nicky Kire, Abeni T.C K Lotha aser Managing committee IRCSN, Patrons aser temulungertem dena liasü.

Iba sentong nung Junior Red Cross G. Rio School Students aser Zoe Group ajanga temeja ken ka aten.

Iba sentong ya Vice President IRCSN Helena Yephthomi lenisüba kübok agi, Associate Pastor, City Church Kohima Zajamo Odyuo-i sentong tenzüka sarasadem aser Jonas Yanthan ajanga tepela o jembia liasü.

ASU & AWO nati Angami nunger HSLC & HSSLC topper tem tushi



Kohima, Monupii/May 8 (TYO): Angami Students' Union (ASU) aser Angami Women Organisation (AWO) nati Angami nunger HSLC aser HSSLC topper 18 nem tetushi agütsüogo. Topper tem rongnung HSLC nungi 12 aser HSSLC nungi 6 densema lir.

Tetushi agütsüba sentong ya AWO building nung agi, kong Revenue Officer Kevingoto Kulnu tongti o jembir liasü.

HSLC nung Angami nunger topper 12 liasü kong Seyievilie Peter Zashümo'er jala Top 2 Ketsino Jane Frances (98.67%) densema lir.

HSSLC Arts nung Vimhakhol Mekro'er jala Top 1 Keletsole Mekro densema Angami nunger topper asem; Commerce stream nung

Peteneino Kisots'o'er jala Top 9 Thejazeno Angami (94%) aser Science nung Mako-o Theüno'o'er jala Top 7 Akhriekuo-ü Theünoo densema nisung ana liasü.

Sentong nung o jembiba mapang Kulnu-i, lanurtem dang mapa ngutetsüsa kaketshisatsü bendanga agüja bushiba ajungshia liasü. Paisa, tanen makai meranga inyaksü koda tongtibang iba indang lemsatepa liasü.

Kaketshisatsü aser employability statistics balala indang lemsatepba mapang pai lanurtem dang pei asoshi tapet stream shimtsü aser iba dak ajemdaker pei sempet aser tejangraba apir career yanglutsü ajungshi.

Maneni pai takok tajung

monguteterem dang temulung ajema makümtsü saka tali meranga inyaka pei jenjang yanglushitsü ajungshi.

Kasa mapang nung AWO tir Neithono R. Sothu aser Jalesoü Yhoshü natia lanurtem ajungshi aser HSLC Top 2 Ketsino Jane Frances-i takok tajung anguba kaketshirtem tenung nung o tatsüka jembia liasü.

Iba sentong ya Asato Paphino lenisüba nung agi, Kevingunuo Meyase-i sarasadem aser Asst priest Cathedral Fr. Megoriekho Thomas-i kaketshirtem atema temaotsü meshizüka sarasademja liasü. Topper tem nem kuli kakets tajung renema agüja liasü. Sentong nungsa Menuolhousie Tsükrü-i ken tajung ka aten.

NEIPF-i Essay tetoktepba nung shilem agitsü ayongzüker

Dimapur, Monupii/May 8 (TYO): North East Indigenous People's Forum (NEIPF)-i ayongzüka Essay zülutepba tetoktepba ka agitsü aser iba nung shilem agitsü atema Nagaland nung lisopurtem jaokogo.

Iba tetoktepba ya "The Role of Youth in Preserving and Promoting the Indigenous and Native Socio-Cultural Traditions Amidst the Modern World" onük nung ajemdaker tokteptsü.

Iba tetoktepba ya arishi küm 15 nungi 24 tsüngda alirtem atema asütsü aser English oshi nung tokteptsü. Essay ya pei handwriting agi ojang 1300 nungi 1500 tsüngda zülutsü aser May 20, 2024 nü tashi nungbo benoktsüla.

Eassy zülurtemi putu ka nungi putu ka ta aruba mapang pei sobaliba indang zülutetsü, koba

tanü asüng lima nung tanem tanemi sama odar. Eassy nungsa loktiliba inyakyim indang aser pa mesüra lai pei sobaliba kümzüka aser wazüka ayutsü atema koda shilem agitetsü iba indang aser sama oya aliba sobaliba ken o ya lanur ka ama pei lokti nung koda ajungkettetsü iba indang zülutetsü.

Eassy zülurtemi pei indang Adhaar Card/ID Card mesüra Date of Birth Certificate photo copy ka attest süur yoktsü nungdaker.

Tetoktepba nung mezüngbuba nem senpet sen 40,000, tanabuba nem 30,000 aser tasembuba nem 20,000 agütsütsü aser iba den nisung 11 nem consolation prize sen 5000 (nisungshia) agütsütsü.

Takoker ajak nem takok marok aser kuli kakets agütsütsü. Sempet agütsüba sentong ya

August 9 nü World Indigenous Day amungba mapang agütsütsü aser iba sentong koba tesem nung agitsü iba indang jelia metetdaksütsü.

Maneni Eassy zülurtemi teküboklen agüja aliba osang tejangja Block Letters nung zülur agütsütsü nungdaker:

1. Name in Full
2. Parents' Name
3. Address: Present and Permanent
4. Date of Birth
5. Name of the Institution if student.
6. Name of the Firm if working.
7. Email address
8. Contact number

Tetoktepba dak sendakba nung osang tejangja agitsü atema item number; 9366190180/6009134544 nung tongtepreteptsü NIPF Media Cell-i metetdaksügo.

Mokokchung nung International Red Cross Day mungogo



Dimapur, Monupii/May 8 (TYO): Alima ajunga den külemi Mokokchung nunga May 8 nü Chief Medical Officer indang Conference Hall, nung International Red Cross Day mungogo.

Sentong tatsüka agiba mapang IRCS Mokokchung mendenbuba aser Deputy Commissioner Mokokchung Thsuvisie Phoji-i, iba anogo koda tongtibang iba indang lemsatep. Pai ashiba agi, meimchir kaka

ama kati ka anepalutepba ajanga asenoki tashidak tamajung aser lendong balala ajangetoggo, ta ashi.

"Red Cross züngsem kaka ama asenok kin, kidong, shilu balala süaka humanity dak tamang akatsüla, kechiyong aseok ajak species ka dang lir," ta DC-i ashi.

Paisa, Red Cross Society züngsemtem dang timtem lendong mapang teyari agütsütsü atema renema atatsü

aser humanity atema longjemshitsü ayongzüka liasü.

Sentong nung Honorary Secretary, IRCS Mokokchung S.S. Akaba Longchar-i lokti pela agizükba o jembia aser Chief Medical Officer Mokokchung Dr. Kibangkumba-i tepela o jembia liasü. Queen Mary HSS, Mayangnokcha HSS aser Govt. High School Mokokchung Village nungi Red Cross züngsemtem aser tesayurtemi iba sentong nung shilem agia liasü.

Dimapur nung World Red Cross Day mungogo

Dimapur, Monupii/May 8 (TYO): Indian Red Cross Society (IRCS), Dimapur District Branch-i ayongzüka May 8 nü St. Mary's Hr. Sec. School (SMHSS) auditorium nung World Red Cross Day mungogo. Red Cross atema taküm universal omenji "Keeping Humanity Alive" liasü.

Iba sentong nung Dimapur Deputy Commissioner aser Dimapur Red Cross tir Tinojongshi Chang tongti tejaoker liasü.

Nagaland nung District Branch tem rongnung Dimapur Red Cross ya ajak dang teyakyakba ta shia Chang-i tenüngsang agütsü. Dimapur indang Managing Committee (MC) züngsem aser volunteers tem dak kanga pelaba lemsatepba den pai St. Mary's Hr. Sec. School kaketshirtem ajungshi, shirnok Red Cross indang wako maneni tejakdangi bener aotsü atema iba anogo Junior Red Cross züngsem kümogo.

Humanity, tebendang maliba, nüjiso, neutrality, telongjem, universality & volunteerism amala yimayimpong ya tanü tensa nung ajaki angazüka benshitsüla, ta pai ashi.

Sentong nungsa SMHSS Principal Neena Dutta tetushi tejaoker liasü aser laia o tatsüka jembia aser Red Cross movement tejakdai bener aotsü atema la aser lar kaketshirtem service agüja liasü. Kasa anogo la ya Red Cross Patron züngsem ka kümogo.

Temetetsü kaji May 8 nü ya alima ajunga nung World Red Cross Day amunger, koba Red Cross movement tenzüksang Jean Henry Dunant asoba anogo

amunger. Pa ya shishilembar ka liasü aser rara nung yiruba sepaitem nem teyari agütsütsü atema pai iba movement ya tenzüka liasü.

Maneni sentong nung Advisor IRCS Captain Hekiye Sema-i okila jembia aser pai Red Cross indang puti otsü aser inyakyimtem indang metetdaksü aser Honorary Secretary Shri K. K. Paul-i achaayanga school nungi kaketshirtem Junior Red Cross züngsem ama tenangzüktepba agia liasü. Iba sentong ya IRCS senyur Ashok Agarwal lenisüba nung agi aser züngsem Kuldeep Jain-i tongti tejaoker metetpelaja liasü.

IRCS Dimapur Chairman Chandu Agarwal aser Vice-Chairman Ajay Sethi nati lokti pela agizükba o aser tepela ojembia liasü. General Secretary Akhale V. Khamo indang osanga zünga metetdakja liasü. Iba sentong nung nisung 300 dak temai shilem agia liasü.

Kasa mapang nung Honorary Secretary K. K. Paul-i, IRCS Dimapur District Branch

tenüng nung sentong nung shilem agir ajak aser mejeta Deputy Commissioner dang pa mapa agütsüba atema kanga pelaba lemsatep. Paisa, sentong takok ngua agitsü atema auditorium agütsüba aser tanga inyakyim nung teyari agütsüba atema SMHSS Management danga kanga pelaba lemsatepa liasü.

Sentong nung MC züngsem Bhagchand Sethi, Ahidur Rahman, Ajit Sethi, Patron Sanjay Jain & Life Members Pradip Jain, Apu Roy, Dipankar Mazumdar aser Rishav Sethi nungeria shilem agia liasü.

Minister P. Beshangmongba Chang-i Tuensang semdang



Dimapur, Monupii/May 8 (TYO): Minister PWD (Housing & Mechanical Engineering), P. Beshangmongba Chang-i May 7 nü District Hospital Tuensang semdangogo.

Mozüki semdangba mapang pai District Hospital Tuensang indang doctor aser staff tem den sensaksema liasü. Sensaksema mapang parnoki Tuensang nung paediatrics aser orthopaedic doctor agi anungba aser nurse

aser technician tem temelen meyoki tangaleni yokba indang metetdaksü. Iba dak sendakba nung minister-i takaratiba nung jenjang agitsü tenangzüka agüja liasü. Minister-isa, mozüki nung shiranga munga alirtem semdanga liasü.

Kasa anogo P. Beshangmongba Chang aser par kibongi Tuensang Town Pastors Union nem ambulance ka tenla agüja liasü.

Longleng DPDB senden menogo

Dimapur, Monupii/May 8 (TYO): Longleng District Planning and Development Board senden May 8 nü DPDB hall Longleng nung menogo. Iba senden ya Deputy Commissioner, Longleng Dharam Raj, IAS lenisüba nung agia liasü.

Seden ya mendenbubai züngsemtem pelashishia

agizüka tenzüker aser iba sülen züngsem tasentem metetpelaba mapang agia liasü.

Senden nungsa Department of Sericulture-i par department indang inyakyim metetdaksü. Kasa mapang nung District Cultural Officer dang taruba senden nung par department indang inyakyim metetdaksütsü nonglokja liasü.



May 08, 2024 nü West Singhbhum (Jharkhand) nung arrshi küm 101, Bela Sen-i lar kidang "home voting option" ajanga vote agütsüba sülen tangokba noksa nung angur. Noksa nung West Singhbhum Deputy Commissioner cum District Election Officer, Kuldeep Chaudhary-a angur.

Taruba küm 10-15 tsüngda India nung sensak tia agientsü: Rajnath

New Delhi, Monupii/May 08 (Agencies): Bodhbarnü Defence Minister, Rajnath Singh-i, taruba küm 10-15 tsüngda India nung sensak tia agientsü, aser ibaji 'Modi tenangzükba' lir, ta ashi.

Kalahandi jila nung BJP 'Vijay Sankalp' rally nung jembidang Rajnath-i, "Pandit Jawahar Lal Nehru nungi tenzüka Indira Gandhi aser Manmohan Singh nung tashi nung Congress lenirtemi sensak tia agientsü ta nangzüka liasü saka parnok ajaki tamakok angu. Ajisüaka asen Ato kilonser Narendra Modi-ibo sensak tia agientsü atema maparen tenzükogo," ta metetdaksü.

Tesüiba küm 9 tsüngda Modi yimsüsüba kübok nütsüng crore 25 bo kanga sensak tia nungi anitetogo, ta shia Defence minister-i, iba ya BJP-i jembiba o masü saka Niti Aayog indang report ajanga metetdaksüba lir, ta ashi.

Tesüiba küm 9 tsüngda Modi-i inyakba amaji tamalen

sorkartemi meinyaktet, ta pai ashi. Rajnath Singh-i, "Taruba küm 5 nungbo India nung pucca ki maliba, tzü tajemtsü mesangoka maliba mesüra LPG gas connection maliba kibong ka danga malitsü," ta ashi.

Kalahandi tensa dak sendakba nung BJP lenirisa, melungtet telok balala nung inyakerkem Kalahandi-i arua sensak tia tourism atema zülü, kechiyong iba tesem ya aya-tzuraba, lumia asüba aser sensak tia aliba tesem liasü, ajisüaka tesüiba küm 9 tsüngda Centre nung Modi sorkar ajanga temelenshi tulu adokogo, ta pai ashi.

Kalahandi Lok Sabha menden nung BJP candidate, Malavika Devi tenüngsanga Singh-i Kalahandi nung alirtem dang jila nung tebilemtsü onük balala national level nung benoka inyaksü atema 'lotus' temaitsü keta aliba party nem vote agüjang, ta mepishi.

Taoba mapang Ato kilonser, Rajiv Gandhi-i, Centre sorkari

sensaker nem sen 1 yokra sensaker ketbo poisa 15 agi dang atonger, ta jemba liasü, ta Rajnath-i ashi.

"Ajisüaka Modi Jandhan account aser direct bank transfer inyakyim ajanga ochimashi anenogo aser tangbo Centre-i yokba sen ajak jagi nübur ket atonger," ta ashi.

Odisha nung BJP sorkar akümtsü atema BJP nem vote agüjang, ta mepishia Singh-i, Odisha nung BJP sorkar tentetba sülen sorkari tekeraba nung Ayushman Bharat health scheme tenzüksü, ta nangzük.

Paisa, kin mesüra tamangba yimsü kecha mebendangi arrshi küm 70 aser temapurtem ajak Ayushman Bharat scheme agi ayimjemtsü, ta metetdaksü.

Modi yimsüsüba mapang nung kiralongrartem anema mapang shidak nung inyakba agi tangbo kiralongra meshimeshia samatsüsa tensa ka nung lir, ta ashi.

Odisha nungbo Lok Sabha aser Assembly elections külemi dang agitsü.

Pitroda-i tashishitsü o jembiba ajanga Congress maaksüdaksüogo

New Delhi, May 08 (Agencies): Tawa interview ka nung Indian Overseas Congress Chairman, Sam Pitroda-i India nung nisung tapu balala aika aliba indang jembidang pai, India nung anüolen tip tsütsü (South) alirtemji Africa nung mesük, anüolen tsütsü alirtem Arab nung mesük aser anüdoklen tsütsü alirtem China nung mesük, ta jembiba liasü.

Iba oji ajanga Congress kanga maaksüdaksüogo.

Congress leniri iba o jembiba sülen mangatetep adoka BJP-i anir aikati Congress aitsüba mapang ka nung pai Congress party menden nungi anenogo.

Pitroda-i, "India nungertem raraba tatalokba kar dak alaka küm 75 tashi pelaa dang külemi liogo, aser India ya alima nung democracy tatishitsü tajung ka lir," ta jembiba liasü.

India ama nisung temeyoktep tapu balala aika aliba linük ka nung onok longjema liteter, kong anüdoklen alirtem China nung mesük, anüolen alirtem Arab nung

mesük, anüdoklen tip tsütsü (north) alirtem temesüng nisungtem mesük aser anüolen tip tsütsü (south) alirtem Africa nung mesük," ta jembiba liasü.

Sam Pitroda-isa, "India-i oshi balala, tamangba yimsü balala, chiyungtsü aser sobaliba balala akhümtsübur," ta jembiba liasü.

Pai jembiba oji BJP-i anir aikati aitsüba sülen Bodhbarnü pai Indian Overseas Congress Chairman menden nungi anenogo aser Congress Tir, Mallikarjun Kharge-ia pai agütsüba shidiji agizükogo.

Congress lenir, Jairam Ramesh-i X ajanga, "Sam Pitroda-i Indian Overseas Congress Chairman menden nungi anentsü telemtetba agi. Congress Tiria pa telemtetbaji agizükogo," ta metetdaksü.

Pai jembiba oji social media nung prokshiba sülen Telangana nung election nüboyim sentong ka nung Ato kilonser Narendra Modi-i, "Tanü ni kanga jashir. Sam Pitroda-i jembiba o ajanga ni kanga jashir. Nisung bendangba shisatsü ya onoki magizüksü," ta jembiba liasü.



May 08, 2024 nü Karimnagar nung Lok Sabha election nüboyim sentong ka nung Ato kilonser, Narendra Modi-i jembidang tangokba noksa nung angur.

India-i UN counter-terrorism trust fund atema sen aika tenlaogo

United Nations, May 08 (Agencies): Alima nung kiralongra anema raraba nung amshitsü asoshi India-i UN counter-terrorism trust fund nem dollar sen 500,000 tenla agütsüogo.

Mongolbarnü India's permanent representative to United Nations ambassador, Ruchira Kamboj-i under secretary general, United Nations office of counter-terrorism (UNOCT), Vladimir

Voronkov ket nung senji agütsü.

Ruchira Kamboj-i sangdong ka ajanga, "United Nations office of counter-Terrorism-i kiralongra amokmeren anema raratsü atema züngsem linüktem den maparen balala inyaker aser iba nungji India-i tongtibang shilem agir. Tang tesüsa tenla agütsübaaji ajanga United Nations-i alima nung kiralongra anema raraba India-i pusemba kuli sayur," ta

metetdaksü.

2022 küm October ita nung New Delhi nung counter-terrorism committee temeja senden ka amenba mapang nung India External Affairs Minister, S Jaishankar-i UN counter-terrorism trust fund (CTTF) atema tenla agütsütsü nangzüka liasü.

Tang tesüsa agütsüba tenlaji densemabo tang tashi nung India-i iba trust fund nem dollar sen million 2.55 agütsür asütsü.

Alima nung takartiba yimti 50 nung Delhi aser Mumbai na densema lir

New Delhi, May 08 (Agencies): Alima nung millionaire teimtiba aliba yimtiji maneni New York sa lir aser alima nung takartiba yimti (World's Wealthiest Cities list) 50 rongnung India nungi Delhi aser Mumbai nata densema lir. Henley & Partners 2024 report ajanga ashiba agi, Delhi aser Mumbai na nung millionaires kanga renlokogo aser US yimtiba, Washington DC-a ajangtetogo.

Henley & Partners report ajangasa Asia Pacific Region nung millionaires aika kümogo, talisa Tokyo, Singapore aser Beijing yimtitem nung rongsen aika lir, ta metetdaksü.

World's Wealthiest Cities list nung Mumbai jenjang 24buba nung lir. Mumbai nung millionaire 58,800 lir, Centi-millionaires 236 aser billionaires

29 lir. 2013 nungi tenzüka 2023 küm tashi nung Mumbai nung millionaire shilem 82 agi teimba aküm.

World's Wealthiest Cities list nung Delhi-a jenjang 37 buba nung lir. Delhi-i Moscow, Taipei aser Washington DC yimtitem ajangtetogo. Delhi nung millionaire 30,700, centi-millionaires 123 aser billionaires 16 lir.

World's Wealthiest Cities 2024 temaba jenjang 10 nung aliba yimtitemji New York City, Bay Area, Tokyo, Singapore, London, Los Angeles, Paris, Sydney, Hong Kong aser Beijing yimtitem lir.

Alima nung takartiba yimti New York City nung dollar sen trillion 3 dak tema lir. Iba yimti nung millionaires 349,500, centi-millionaires 744 aser billionaires 60 lir.



May 08, 2024 nü Patna nung aliba Patna Museum arongba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MAY (MONUPII) 09, 2024

Aluyimer benjong

Aliba yimtak taküm 2024 küm a Züngi benjong amongtsü sangdongba osangji asenok ajak asoshi nümadangtsü osang tajung ka lir. Asenokbo ajak alia achir aser alia agir, tayoktsübo kecha maka ta aliba putu tensa ka nung Aliba nunger aluyimertemi züngi benjong tashi ayongzüka parnokü züsentetba züngi alimai meteta ayoktsüsa inyaktetba mapaji tanü, talisa, Ao lima asoshi takok tuluka asütsü. Tanü asenoki amongba sobaliba benjong Moatsü aser Tsüngremmong ama benjong ajak ya aluyimertem benjong lir, kechiyong item ajakji aluyimba dak sendakba benjongtem lir. Ajisüaka, tanü asüng asenoki tsük lu mayimba agi Moatsü aser Tsüngremmong amongtsü mejangrar aser mapeter. Aji oda, tanü asüng Moatsü aser Tsüngremmong amongba yabo tsüraburtem otsü aser senmang mamatsü aser mesendoktsü asoshi amonger amai ka dang kümogo. Atangji, asen tsüraburtem sobaliba tajung mesendoki benjongbentsü monga temeim aser tesendaktep akangshibajia junger, anungji amongtsüla. Ajisüaka, asenoki alu mayimba agi tanü putu tensa asenok mapa dak apet benjong amongtsüsa kecha maka aser mayongzüktet alidang, Aliba nungertemi züngi lu ayimba agi züngi benjong amongtsüsa yanglutetba sentongji asenok ajak meyong züngi benjong akümstsüla. Iba benjongmong nung akhi tsürabur sobaliba benjongtem nung inyakba ama, Tsüngrem nem tenüngsang agütsüba aser Tsüngrem dang temoatsü meshiba sentong dena enoksema agira, iba jagi asenok Tsüngrem metetba aser Tsüngrem akhümtsübuba tangatetba dena asentenshitsü. Alima nung kin shia pei pei benjongmong lir aser item ajakji pei taküm asoshi inyakba mapatem den sentaktepba benjongtem lir. Aji oda, aseni inyaktetba mapa ka madak pelatepa benjong amongtsübaji nisung ka asoshi alima nungbo tepelatiba anogo asütsü. Tanübo iba ama aluyimba nungi adokba benjong tasen karbo Nagaland nunga tesem tesem nung among tenzükogo. Itemji tesem kar nung naring (orange) benjong aser kar nung alo (potato) benjong ta among tenzükba angur. Atangji, tanü putu nung akhi ama tekong nung tsük lu ayimtsübaji tajangzük aketba mapa kabo masütsüa akok, iba jagi mayimer südi. Ajisüaka, alu ayimtsübaji tsük lu dang masü saka tang ayimba amaji züngi aser menti lu, naring aser jemben lu, alo aser bengana lu, somomo lu, mamazü lu, mongmong lu, mersü lu aser ponglashi aser manü, lasüng aser süngmok lu ta asenoki achiba chiyongtsü lu tapu aika asen lima nung asenoki yimtettsü. Atangji, nisung aikati kozü lu, rubber lu aser jenjang aketba süngdong lu ayimer, ajia junger. Ajisüaka, asenoki achiba chiyongtsü lu ayimba nungjibo küm shia asenok benjong monga pelateptsüsa züsentetba mapang lir. Aji oda, asenoki ayimba lu nung züsentetba madak pelatepa benjong amongba jagi nisung ajak dang iba luji ayimtsü ajungshir asütsü, kechiyong züngi lu ayim nung dang züngi benjong amongtsü. Kasaji, shitakba nungbo tsük lu ayimertem dang Moatsü aser Tsüngremmong amongtsüla ta asenoki angatettsü. Tamalenbo Moatsü aser Tsüngremmong benjongtem Ao lima nung yimtsüng shia anogo balala nung monga liasü, kechiyong ibai alu inyakmaba anogo aser mapang dak keta liasü. Ajisüaka, liromedemtsü asoshi benjong anaprongla kasa anogo nungsa amongtsü lemtet. Iba amaji tanübo Aliba yimtak dang Züngi benjong ya amonger, kechiyong parnokü dang benjong amongtsüsa züngi lu tulu yimteteter. Ibaji dang masü saka parnokübo züngi matangba mongpu nunga züngi tangdaktür. Ano, ibajiang jenjang tasakba aser tajungba nung ayoker. Aji oda, parnokü dang angazüka tangar yimtsüngtemia parnokü den külemi züngi lu ayim tenzük nungbo, Maatsü aser Tsüngremmong benjong külemi amongba ama, mapang kasa nung Züngi Benjong yaa Ao lima tesem ajak nung nashi ak tepseta pelatepa mongla. Ano, idangjiang alima talang nungi dena Züngi alitsü aser asenok den pelatepa Züngi benjong amongtsü bendangertem arula.

OLEMSABANG

Lanurtemi Nagaland tasen ka yanglutsü tenzüktsüla

~ L. Kika Pongener.

(Yashi adok nungi...)

Iba Revolutionary Movement jagi tamasa sorkar inyakyim nung ochimashi inyakba kar lira, itemji repranga metongshitsü merangtsüla. Tanü asen lima nung nuburtem tim-atebaji temelen (Tax) saru-sajiba yagi tim-aterer aser nuburtem asateper. Aji oda, asen Naga nunger nuburtemi saru-saji saruba ya linuk tenzükertem dak dang tenuk yoker dang ashi, jungjunga bushidangra, lokti-tentet (Unions) aikati saru-saji ya sarur, aser item saru saruba jagi nuburtem dak kongshir. Ano Center sorkar nungi terenlok mapa (Development Works & Projects) atema sen sanction aruba nung VIP Percentage, Departmental Percentage, Party Fund Percentage etc. yamala kar danga katizüka lira, aser ano jila nung sungküm (Gate) nung osettsüset abenba Gari nung saru meshiba nunga ashiko, sorkar department kari danga temelen saru (Tax) meshia lira, item ajakji repranga metongshitsüla. Ano aji dang masü, tanü asen lima nung lokti-tentet (Unions) aika-sa tenteta lir, item lokti-tentet ajak jagi saru sarur, aser item saru ajakji carrying charge aser para (Fare) nung enoker meshiba agi osettsüset nung jenjang ya tali atur, aser ibajagi nubur dak kongshir. Anungji menungdakba lokti-tentet (Unions) karbo anendaktsütsü atema sorkar nem takangba agütsütsüla. Ano nujiso tenung atemer, temelen saru (Tax) meshiba, amokmerenba, nisung pua bener aoba (Kidnapping), senotsü tama-khangtsü akhangba (Ransom demand), etc. yamala mesukba tashiyim mapa inyakbatem metongshitsütsüla.

Tanabuba nung iba Revolutionary Movement jagi tamangbaren inyakyim nung ochimashi aser meshitak inyakbatem metongshitsüla. Tesasatsüka, tanü asen lima nung arogotem aser mungdangtem karbo ketdangsuba nung ochimashi agi sunga aliba angur. Nuburtemi aikati nungsen jembibaji odangpo mejembir, langkabo meshitak aliba agidang jembir, kechiaser mi mapora mokozi madoktsü. Manganutsü mali, tanü arogotem aser mungdangtem inyakyim aika nung, tashishitsü keta inyakba angudang kanga sasa-a bilemer. Ano Tsüngrem lar aser Tsüngrem tenzükera aika sen/rongsen nung dang rangloker tenzükera lir. Tanü asen lima nung, Tsüngrem tenzükertema karbo 'Luxurious life' jenjang nung libaliroba-a angur. Hau-niii...Tsüngrem tenzükera timtema dang alitsüla ta-ka masü-ako, Tsüngrem tenzükera aika ochishia/meranga inyaka tenzükera-a lir-ko, saka ano karbo tashishitsü keta-a angur. Tanü asen lima tia ya jungjunga reprangdangra lenla ajunga nung temetongshitsü kanga-sa nungdaka lir.

Anungji tanü asen nubur tulu-tila ajungai aginubaji...Nagaland tasen ka yanglunur. Aser iba Nagaland tasen ka yanglutsü atemaji tangar shinga-ia masü, saka lanur tazünger tashitemeteteremi longjemmer tenzükera inyaktsü mulongtettsüla. Lanurtemi inyakdi ta mulongtetra takoktsü lenmang sadem-sadema dang lir. Aiben kanga-sa sasa-a bilemba kaji, yimsusurtemi yimjak nung temzüng-ozüngi memelaba ken o mashi-mashi jembiyongjia lanur tazüngertem kati danga iba anema ola madoker. Sorkar nung ketdangsuba mapa nung tashishitsü keta inyakba, mesura ozüng ammertemi nubur tai maketba nisung dak tashiyim agi inyakyongjia lanur tazünger kati iba anema ola madoker...!!! ta asüadang kanga-sa nemjema bilemer. Anungji lanurtem, tarutsü aliba putuji nenok meyong ako...Tanü nenoki tarutsü putu atemaji nendak-nendaka inyaka meyanglushira nenoksa akoksatsü. Anungji iba mapa ya junger ta agizüktetra, Aotsür Aor lanurtemi tamasa inyaka tenzük nungpo kanga ajungtsü ta bilema lemsateper. Anungji nenok lanur tazüngertem longjemmer Nagaland tasen ka yanglutsü tasü-ita apusoang niii...ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US nunga Khristanem anema inyakba bulua kümdar: ICC

May 08, 2024: Khristan melungtet telok aser alima tesem balala nung Khristanem reshikangshiba jenjang asadanga telok- International Christian Concern (ICC) Tiri, asen linük (America) nunga Khristanem anema inyakba bulua kümdar, ajisüaka ibaji America nung Khristanem ishikati dang meteta lir, ta metetdaksü.

Washington D.C nung amenoka aliba ICC nung Tir Jeff King-i, "Asenok 'kettle' nung alo ama kümogo aser tziü tatsükba dang kümdar," ta pai ashi.

"Yimtenren tsütsülen nungi nisung aikati ibaji memetet, aser tziü tatsükba akümer, saka tziü kong nungi ajaerar memetet," ta pai ashi.

America aser alima tesem balala nung reshikangshiba Arogo aser Khristanem atema ola adoktsü asoshi 1995 küm ICC teteta liasü.

Tang ICC-i talisa tang Texas nung Staci Barber indang ken o pusemdar. Barber ya Houston anasa aliba school ka nung tesayur. Yaküm September ita nung sentong ka nung school nung wako asongba tesem nung la den tesayur ana densema sarasademba atema school principal-i la arrtsüba sülen taküm March ita nung lai Katy Independent School anema ken o benokogo.

School principal jagi Barber dang, kaketshirtemi angutsüsa tesayurtemi sarasadem masütsüla aser kaketshirtem dang sarasademtsü atema majungshitsüla ta shia liasü, ta American Center for Law & Justice (ACLJ)-i metetdaksü.

Tamalen-a Barber-i school campus nung Students for Christ chapter tenzüktsü meranga liasü, ajisüaka school board-i school nung inyakertemi tamangba yimsü majungkettsütsü aser tenokdang-a menokdangtsü, ta telemtetba agia liasü.

"School nung inyakrtemi tamangba yimsü

majungkettsütsü, manitsü, shilem magitsü aser kaketshirtem telok balala indang yimsü dang sendakba sentongtem nung shilem magitsü parnoki lemteta lir. Iba ya linük temzüng alema lir," ta ACLJ-i metetdaksü.

Osangbener den jembidang ICC Tir King-i, "Barber-i benokba ken o ya ajanga school boards mashimaluba sayur aser principal-ia linük temzüng ajanga nüburttem nem agütsüba temeden balala mejangjaba sayur," ta ashi.

King-isa, US nung Khristanem semapaba lenla ajak nung kanga bulua kümdar, ta ashi.

King-i, ICC-i alima tesem balala nung Khristanem anema inyakba mita repranger aser US densema anüolen aliba linüktem nung nüburttem nem yimsü temeden agüja liaka tangbo Khristanem anema inyakba bulua akümer, ta ashi.

Paisa, "Ochimashi, judicial tashi maitba aser tesempa o jembiba ozüngtem ajanga Khristan yimsü anema inyaker," ta ashi.

King-i, kijai tashi amshia yimsüsürtemi yimsü temeden agütsütsü ta nangzüker, ajisüaka parnoki nangzükerba amaji meinyaker, ta ashi.

"Tang yangi anüolen linüktem nung atalokba ya nüburttemi metetsüla. Khristan yimsü sempartemi tesempa ajungkettsür aser parnok nükjidong ataloktsü atema inyaker," ta pai ashi.

India linük atishia King-i, India linük temzüng nungbo sensotem nem tamangba yimsü temeden agüja lir, ajisüaka iba linük nungji Khristanem anema inyakba kanga bulua akümer aser Tenla kitem raksatsür, ta metetdaksü.

"Par linük temzüng nung yimsü temeden agüja lir, ajisüaka ibaji mezüngshir. Atangji nungbo yamaji atalokdar. Lenmang nung mesüra Tenla kidang pastor tem anema inyaker, saka

shirnok apur? Pastor tem ang apur. Tang (US) State tem nunga yamaji atalokdar," ta pai ashi.

Paisa, Canada aser Europe nung tesempa o jembiba ozüngtem tesashiba lir saka iba denji külemi pei tebilemba sadoka jembiba-a nokdang, ta metetdaksü.

"Iba ya asalentong yanglur inyakba lir aser itemji Khristan yimsü atema yimtenren tsütsü tsükchirtem lir. Parnoki tashi nguogo aser item ozüngtemji amshir. Yimtenren nung tsükchirtem anema parnoki democracy tashi amshir," ta pai ashi.

Jeff King-i, tesüiba küm 30 tsüngda America nung sobaliba kanga melenshiogo. Yimsüsürtemi tashi tali amshiba anema nüsüngtemi ola madoker, ta ashi.

"Tesüiba küm 30 tsüngda parnok inyaksangshi ajanga nüburttem nem miim chidaktsüogo. Temenen mapatem prokba nung media aser entertainment industry-i tongti shilem agiogo aser tamangertemji majung ama sayur," ta pai ashi.

Tawa U.S. Supreme Court-i agütsüba obendang karbo pelaa agizüker, ajisüaka school boards aser mapa agütsürtem inyaksangshi kanga majung, ta pai ashi.

"Khristanemi tamasa pei sasep nung asentenshütsüla. Asentenshiji pei dak nungi tenzüktsüla. Asenok ajaki temelung meyiper Kibuba dang ayimdensüla, asen linük ya yimtenren linük ka masü saka yimsü linük ka asütsü atema sarasademtsüla," ta pai ayongzüker.

"Asenoki asentenshi nüngdaker aser ibaji asen dak nungi tenzüktsüla. Kibuba dang 'Ni tanaben jaang aser ni Nü meyong, Nai kechi shidir ni inyaksü. Kü taküm rangben Nü meyong," ta asenoki sarasademtsüla," ta paisa ayongzüker.

ANOGO ABEN TSÜNGREM DEN

Taochi aser Tesünep

"Asen Tebu Tsüngrem aser Kibuba Yisu Khrista nungi nenok dangi taochi aser tesünep süang."

-Rom 1:7

Efesa nung arogo teku dangi züluba shiti shia "Nenok den taochi liang, aser asen Tebu Tsüngrem, aser Kibuba Yisu khrista taochi nenok den liang" ta tenzük. Ibai Pauli taginüba o ka dang züluba masü, saka ochi temeim agi zülu. Ibai teti tesütep o talisa küm tasen ka tenzükdang ibai kanga tapet lir. Idaki ochi tulu asem dena lir, Tebu Tsüngrem, Kibuba Khrista aser tamangertem asoshi temoatsü. Asenok tesüngmangtsü mapang ka nung lidar. Mangashiba osang angashir, manguba oset angur, meimlaba tashidak agi nisung jenti asür, scientisttem raraba oset akidang meyanglutet aliba yangluteta amshir. Alima kanga dang karaa melenshia aor. Telatet kecha maka kin kati kin ka raksatsütsü teraksatsüba tashi tait oset adoker. Iba ama lima ka nung alidang asenoki tarutsü jenokdak atema bilemer aser asenok temulung alemdakji Khrista tesayuba, tematiba Tsüngrem indang tesayuba nung anisüngzüker. Ibaji dang teperi masü. Iba dang tali tematiba Tsüngremji asen Tebu lir. Ajak Pai yanglu, ajak Tebu Pa asünung alima ajunga nung aliba meimchir tembar küma tesünep nung alitsü aji Pa nükjidong. Saka ano Pauli Khristaji kibur ta ashir. Tejen Lai Yihova aser Tasen Lai Kibur ta amshi. Tebu aser Techir kasa dang. Tetenzük Techir Tebu den liasü, aser Pa ajanga ajak yanglu. Kibubaji teti tatem maka Tsüngrem chir , shiba dak meimchir aria bilemba Tsüngrem ain alir. Pa otsü nung kibur. Pa chuba ka ama arutsü asenoki yongya atar. Pa kodang arutsü shingai memetet- Pa taküm küm arutsüa shibai metet!

Pauli taochi aser tesünep asenok nem agütsütsü sarasadem. Item o ana ya jangratemtsü otem lir. Yangji taochi tetezü Tsüngrem temeshi temeim asenok nem agütsüba lir. Tesünep tetezü junga aliba. Aiben asenok Khristanemi asenok shidakba nüngdakji mangateter! Sen kara , temaba jenjang nung lira, sempet tulu kara, mesüra anema lira, asenok junga alitsü ta aikati bilemer! Masü, asenok shidakba nüngdakji "taochi aser tesünep" lir. Tsüngrem tenüng sangang.

Kaduna state nung Khristan trok tepset

May 08, 2024: Amongnü nüburttem yimjung nung (May 5) Nigeria kübok Kaduna state nung Fulani Muslim nungertemi Khristan yimtsüng ka amakdang Khristan trok tepsetogo.

Amongnü aonung Fulani züngsemtemi Sanga County kübok Khristan yim Ambe amak, ta Zachariah Sanga-i osangbenertem nem metetdaksü.

"Parnok ket nung prangpong, nok aser süngsü bena liasü. Khristanem amoi oa lia Fulani züngsemtem aruba sülen parnoki ki dak injang khaloktsüba den külemi Khristanem dak injang khaloktsü," ta pai ashi.

Parnoki Khristan trok tepset aser Khristan ti yirutsüogo, ta paisa shisem.

Nigeria National Assembly nung züngsem, Daniel Amos-ia sangdong ka ajanga Khristan trok tepsetba aser ti yirua medical treatment agiba osang metetdaksü.

"Ni iba tatalokba ya sashia aitsür. Iba ya ozü constituency aser state nung yimjung raksatsütsü nükjidong nung inyakba lir. Ozüng alema inyakertem ajanga ozü

nüburttem yimjung nung melitetsüsa akümbe ya onoki magizüktetsü," ta Amos-i ashi. Amos-isa security agency tem dang Kaduna state nung Khristanem anema inyakba nokdangtsü atema inyakang, ta metetdaksü.

Paisa security agency tem dang aibelenertem aputsüla, kechiyong ozü nüburttem tesünep nung alitsüjikanga tongtibang, ta metetdaksü.

Alima nung Khrista sülen anidakba atema nisung teimtiba tepsetba linükji Nigeria lir. October 1, 2022 nungi September 30, 2023 tashi nung Nigeria nung Khristan 4,118 tepset aser Khristan 3,300 dak tema puer oa liasü (Open Doors' 2024 World Watch List report).

2024 World Watch List nung Khristanem alitsü atema linük tamajungtiba 50 rongnung Nigeria ya jenjang 6buba nung lir.

Nigeria aser Sahel region nung Muslim Fulani kin aika lir, aser parnok teimbakati Khristanem anema meinyaker, ajisüaka Islam yimsü alia amanger Fulani telok kari Khristanem maneni amaker.



Fort Defiance, Arizona nung Episcopal Arogo indang Good Shepherd Mission Campus noksa nung angur. Navajoland nung aliba Episcopal Arogo ya missionary Arogo ka akümstü. Taoba hopta 81buba Episcopal Church General Convention nung Governance & Structure committees-i iba Arogo ya missionary Arogo ka asütsü atema vote agütsütepa bangzüng ka agizükogo.

AO OSHI ANGAZÜKDAK:
TANÜ ANGAZÜKTSÜBA OJANG



Süngoko

(n) süngdong nung meyiba süngotu tako ka, sor achir (bitter leaf)

* Süngoko ya ümsemtzü nung sor achir.

Süngolang

(n) süngotu ajeptepba (bundle of leaves)

* Alu lenmang lenjem nung tama aoertemi süngolang ka yuja liasü.

OLONG PAITEP # 6781

1						2				3
								4		
5		6				7				
8										9
									10	
				11		12				
		13								
14						15				
				16						

TIPLIN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6780 TELANGZÜBA

TIPLIN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



Bengaluru aser Mumbai na tsünga kilometer 72 six-lane highway ka yanglutsü. Karnataka nung iba lenmang yagi Chitradurga nungi Davangere tashi sendakteptsü aser iba ajanga senzusenpongertem mapang kümzükdaksüba dang masü saka tesendaktep tajungba kümdaktsütsü. Union Minister of Road Transport & Highways Nitin Gadkari-i iba lenmang indang noksa ka lemsatepogo. Iba lenmang ya sen crore 1400 intoka yanglutsü. National Highway Authority of India (NHAI)-i sustainable technique tem aser bituminous concrete nung plastic aser service roads nung milling material amala amshitsü sentong lir.

Mizoram: Ali kiburtemi ayongzükba longkak aitba sentong aginogo

Aizawl, Monupii/May 8 (Agencies): Bangladesh den arrtsü nung Mizoram kübok Lunglei district nung National Highway-302 atsülangshia aliba dak sendakba nung landowners' association-i mapang telatet ka makai longkak aitsü asoshi ayongzükba Mongolbar nikongtsütsü aginogo ta kettangsürtemi metetdaksü.

NH-302 Land Owners Co-Ordination Committee, kong Lunglei district kübok Lungsen aser Rangte village councils densema lir parnoki Hombarnü longkaka aitba sentong tenzük, aser Centre meyong construction company, National Highway Infrastructure Development Corporation Limited (NHIDCL) aser tanga contractor tem dang Lungsen tesem nung national highway atsülangshia aliba mapang telatet ka makai anena atatsü asoshi tetuyuba agüja liasü, ta parnoki ashi. Ali melen temenok magütsüba dak ajemdaker parnoki iba jenjang agi.

Co-ordination committee mendenbuba Thangrema-i, longkak aitba sentong ya

Mongolbarnü nikongtsütsü 4 ako nung aginogo, kechiyong NHIDCL-i beneficiaries list, compensation amount aser tanga tenügdakbatem parnok indang headquarters dangi abentsü ta tenangzükba agüja liasü, ta ashi.

Paisa, parnoki NHIDCL nungi telangzüba May 25 nü tashi atatsü aser iba construction company yagi nangzükba ama minyakra iba sülen taruba jenjang agitsü atema telemtetba ka agitsü, ta ashi.

"Onoki longkak aitba sentong 4 ako nung aginogo, kechiyong NHIDCL-i beneficiaries list, total compensation amount aser tanga tongtibang tenügdakbatem parnok indang headquarters nung benoktsü tenangzükba agüja liasü. Onoki May 25 nü tashi atatsü aser atakzükja aliba mapang tashi nung onok nem ali temenok magütsüba iba sülen taruba jenjang agitsü atema telemtetba ka agitsü," ta Thangrema-i ashi.

Pai ashiba agi, construction company yagi atakzükja aliba mapang tashi nung ali kibur 30

dak tema nem temenok magütsüba atema longkak aitba sentong ayongzükba liasü.

Maneni pai, ali melen temenok atema ali kiburtem küm ana dak tema ataogo. Alitem ya karbo Indo-Bangladesh arrtsü nung Lunglei aser Tlabung jila na tsünga NH-302 atsülangshiba mapang kongshiatokogo, ta ashi.

Paisa, ali ya 2022 küm asadangzükogogo aser ali karbo ali kibur aser contractor tem tsünga tangatettep nung national highway atsülangba mapang tusatokogo, kechiyong ali kiburtemi lenmang tajung aginüa liasü, ta ashi.

NHIDCL-i ali kiburtem takhangba sentoka toktsüba atema parnok nongshitsü asoshi iba longkak aitba sentong ayongzükba liasü, ta pai ashi.

Thangrema-isa, Lungsen tesem temeket nung ali kibur 70 dak tema nem parnok ali dak kongshiba atema 2021 küm temenok agütsüogogo, ajisüaka ali kibur 30 shi tang tashi temenok mangu lir.

Arunachal Pradesh BJP-i züngsem 28 mintok

Itanagar, Monupii/May 8 (Agencies): BJP Arunachal Pradesh unit-i Mongolbarnü party züngsem 28 küm trok atema mintokogogo

Item party züngsemtem yagi Arunachal Pradesh nung tawa agiba assembly aser parliamentary constituency tem atema election agiba mapang party candidate tem anema nokdaksü atema telemtetba agiba atema party nungi mintoka liasü.

Arunachal Pradesh BJP-i sangdong ka ajanga ashiba agi,

item züngsemtem yagi 2024 parliamentary aser assembly election mapang BJP-i tetuyuba agütsüba anema telemtetba agiogo.

"Item party züngsemtem yagi parnok indang Assembly & Parliamentary constituency tem nung official party candidate tem anema tokteptsü atema telemtetba agia liasü. Mendenbuba Tarh Tarak lenisüba nung State Disciplinary Action Committee-i tetuyuba agütsüba sülen party-i züngsemtem küm trok atema

mintoker," ta Party sangdong nung shia lir.

Party nungi mintokba züngsem 28 yagi BJP den longjemer aliba NPP, PPA aser NCP nunger den tokteptsü atema parnok indang candidate tem yoka liasü.

Temetetsü kaji BJP-i yimsüsüa aliba Arunachal Pradesh nung assembly aser Lok Sabha elections ya April 19 nü agia liasü.

Arunachal Pradesh assembly elections indag result June 2 nü sangdongtsü.

Them Iew Mawlong nungi kibongtem anintsü atema Meghalaya sorkari June 7 nü telemtetba ka agitsü

Shillong, Monupii/May 8 (Agencies): Them Iew Mawlong nung alir kibong 342, tanga tesem kati anir oa lidaktsütsü atema tatembangbuba telemtetba ka agitsü atema Harijan Panchayat Committee (HPC) den senden ka June 7 nü amentsü asoshi Meghalaya sorkari telemtetba agiogo.

Meghalaya sorkari ashiba agi, inyakyim benoka inyaksangshiba mapang ozüng alema arua

alirtembo masadangtsü.

Meghalaya deputy chief minister Prestone Tynsong-i ashiba agi, "kibongtem tanga tesem kati anir aotsü tanü onok sensaksemogogo. Parnok aninba sülen iba ya teti atema asütsü, anungji iba dak sendakba nung ken o balala sensaksemogogo aser HPC delegate temia kanga junga agizükogogo."

"Parnoki (HPC) meyipa or

ano khen kibongtem den sensaksemshitsü atema mapang talila meshiogo aser June 7 nü onok ajurutepba tatembangbuba telemtetba ka agitsü," ta Tynsong-i ashi.

Meghalaya deputy chief minister-isa, mapang talangka nung bangdaka aliba iba ken o bentetba mapang ozüng alem arua alirtem tesem tasenba nung lidaktsütsü atema masadangtsü, ta ashi.



Guwahati: Manipur Chief Minister N Biren Singh-i Bodhbarnü ashiba agi, sorkari ozüng alema state-i arua alir nisung 5457 jangjaogo. CM Singh X ajanga ashiba agi, May 7 nü tashi nung Manipur kübok Kamjong district nung ozüng alema arua alir 5457 putetogo. "Item nisungtem rongnung tang tashi nung nisung 5173 indang biometric data bendenogoo," ta CM Singh-i ashi.

AstraZeneca-i EU nungi COVID vaccine agiener

London, Monupii/May 08 (Agencies): Anglo-Swedish mozü yanglur AstraZeneca-i alima ajunga nungi COVID-19 vaccine agientsü, ta UK nung amenola aliba media outlet The Telegraph ajanga Mongulbarnü sangdong ka nung ashi.

Company ajanga par sasa "marketing authorisation" agienba sülen iba mozü ya European Union nung mamshitetsü, ta report ajanga ashi.

AstraZeneca-i iba vaccine agientsü application ya March 5 nü agütsü aser application ya May 7 nungi mapa kuma aor. Iba company ajangasa ano iba mozü amshitsü mela aliba UK aser danga linüktem nunga kasa applications agütsütsü. Covid atema parnok vaccine dang Vaxzevria ta jaa liasü.

COVID-19 atema "surplus of available updated vaccines" mechi 'commercial reasons' mechi alima tesem ajunga nungi agientsüsa akumer ta AstraZeneca-i ashi. Iba vaccine dang tajungba vaccine adoka melener, koba ajanga variants tasen aziokteter ta ashi.

Covid mozü yagi nisung kar asü aser kar temang yiru ta jembia UK nung iba mozü yanglur anema sen million £100 jenjang ken o benoka lir. Parnoki February ita court nem documents agütsüba nung, par vaccine Covishield yagi kar dak TTS mesüra Thrombosis with Thrombocytopenia Syndrome" adoktsü akok ta ashi.

TTS ajanga nisung temang nung azü telong adener aser azü platelet count ajema

kumdahtsür aser iba timtem ya UK nung nisung 81 asüba dak sendaktepa lir. Ajisüaka AstraZeneca-i court nung ken o benoka aliba mechi Covishield agientsü telemtetba agiba masü ta ashi.

"Iba mozü amshir mezüing küm kisüing nung nisung million 6.5 dak tema takum kumzük aser alima nung iba mozü doses billion asem dak tema agütsü, ta independents estimates ajanga ashir. Onoki meranga inyakba alima nung aliba sorkar balalai agizükogo aser alima sünga pokteta aliba tashidak tembangdaksütsü asoshi tongtipang component ama züingshir. Tangbo Covid-19 vaccine tabu aika yangluogo, aser updated vaccines peria angur," ta AstraZeneca ajanga sangdong ka nung ashi.

Rafah mechi US-i Israel dangi bomb yokba anena lir

Washington, Monupii/May 08 (Agencies): Israel-i Gaza south tsütsü Rafah yimti amaktsü südi ta temulung melemba yong US-i Israel asoshi bomb yokbatem taoba hopta anena lir, ta US ketdangsür kati ashi.

Iba shipment nungya 2,000lb (907kg) bombs tejang 1,800 aser 500lb bombs tejang 1,700 lir ta ashi.

US-i Rafah nung civilian temi asoshi khuret lemsatepba Israel-i ajakbo mebenetet, ta ketdangsüri ashi.

Israel-i telangzüba kecha agüja mali. Israel sepitemi tanks teyari nung Egypt den arütsüa aliba Palestine nung tsütsü Rafah crossing agir ghonda ishika lir ano Israel-i tayimtsü amshia Gaza Strip nung amak.

Israel-i bomb pokloksüba ya talisa Rafah temeket nung liasü. Bomb pa pokloksüba nung kibong ka nungi züingsem tenet asü, ta yangji aliba doctor temi ashi.

Taoba küm October ita nungi Israel aser Hamas tsüingta rara arudang Rafah ya teyari osettem bener aitba tesem tongtipang ka liasü aser Gaza nungi jena aortem atema iba tesem ya dang liasü.

Iba crossing ya Bodhbarnüa shibanga liasü, saka Israel mitkar temi anasa Kerem Shalom crossing tanaben lapoker ta ashi, koba Hamas-i rocket khaloktsüba ajanga anogo pezü shibanga liasü.

Hamas fighter samatsütsü aser parnok indang ki o jen raksatsütsü atema "limited" operation tenzüktsü lia Hombarnü Israel mitkari civilian meyirijang aika dang Rafah yimti anüdoklen nungi ainshitsü totuyuba agüja liasü.

Kasa mapang Israel nung pua alirtem aser Palestine

nunger tepuokdak alirtem chioktsü dena ceasefire ka atema maneni jembishinü akar.

Cairo nung tetsüingtai ia jembirtem ajanga Israel aser Hamas tsüingta item ken o jembishinütsü lir.

"US taginüba, Israel-i Rafah nung ground operation tulu metenzüktsüla, kong nisung million ka dak tema taolen maka jenoka lir," ta US administration ketdangsür kati Mongulbarnü ashi.

Strategic Consultative Group yimya nung Gaza tesem dangalen ama mesüi Hamas den raratsü aser Rafah nung civilian temi nüngdaka aliba peritsütsü atema onoki jembia arur, ta ashi.

"Item onük ya tejembidak aser ozüi lemsatepba ano tatem kati maruteti lir. Israel lenirtemi iba ama operation agitsü atema telemtetba kati arur amai ajiteter, anungji Israel-i Rafah nung amshitsüsa aliba nok-nü yoktsü aliba kanga junga asadanger. Iba ya April ita tenzük."

"Iba yongji, taoba hopta onoki nok-nü shipment ka anena ata. Yangji 2,000lb bombs tejang 1,800 aser 500lb bombs tejang 1,700 lir," ta ketdangsür yagi ashi.

"Onoki 2,000lb bombs amshiba anentsü atema rangloker lir, kechiaser Gaza tesem balala nung iba bomb ajanga nisung aika aliba jila nung teraksa jenti agütsüba ngua lir. Iba shipment atema tatembang telemtetba ka ano magi lir."

Item shipment ya taoba mapang sen billion \$17 jenjang military aid package agütsütsü telemtetba agiba nung maden saka taoba mapang lemzüktsüba nungi lir, ta ashi. 2,000lb bombs ya Mk-84s

mesüra BLU-109s mesüra anaprong indang jembir alitsü akok.

Mk-84s ya jenjang talangba, general purpose munition aser BLU-109s ya penetration bomb lir, koba tema temerang mesüra ali telung nung targets tem atema amshir. Bomb tabu anaprong ya JDAM (Joint Direct Attack Munition) kits nung inoktetsü, koba satellite navigation amshia pokdaksür. Yangji laser guidance kits tema inokteter.

Item bomb ya kanga temezüing, saka Gaza ama nisungtem tsüingtepa aliba tesem nung teraksa tulu agütsür. Aser yangji tebilemstüji lir. 500lb bombs ya guidance units nung inoker tayimtsü nungi tsükdaksür.

Israel-i item hadir ya koma amshir onoki tejangja memetet, saka Israeli Air Force nungi media posts nungbo F-16 aser F-15 jets nung JDAMs inoker amaktsü aliba sayuogo.

Nok-nü soita ayuba ya Israel-i Gaza amakba atema Washington tebilemstü tali akumba temaitsü ka lir.

Hamas-i arütsü alema aita October 7 nü Israel south tsütsü amakdang nisung 1,200 shi tepseter ano nisung 252 pua bener aoba mechi Israel-i Gaza amak tenzük.

Tang tashinung nisung 34,780 dak tema tepsetogo, ta Hamas meyong health ministry ajanga ashir.

November ita tezüingzüktep ka agia hopta ka ceasefire liasü aser iba mapang Hamas-i pua alir nisung 105 chiok aser Israel nung jail nung aliba Palestine nung 240 shi chioka liasü. Hamas-i pua alir nisung 128 tia mejangjateti lir parnok rongnung nisung 36 süoko ta bilemer.

OFFICE OF THE LONGSA VILLAGE COUNCIL

Mokokchung : Nagaland - 798601

PELABA SANGDONGER

Longsa lime tzü mopong lending tulu ajurur nübertem ajak koda masü tia nung shisabulua alidang shirnokisa aria bilemba temaitsü nübo, rongsen aser sarasadem tenla tulu ajanga nübertem mulungjang anisüingzükdaksüogo, Senso ajak tenüing nung Longsa Village Council ajanga nenok ajak dang kangasa pelara ni. Tsüngremi ner lokti, yimten aser kija kibongtem kechisarina ajak nung moajang ta ozü sarasadem.

Tongtipangsa teküpoklen agüja aliba lokti aser kija ajanga tenla tulu tenlaba alima dang sangdonger.

- 1) Shri. Metsübo Jamir, Hon'ble Minister RD & SIRD Rs. 5,00,000
- 2) Shri. Imkongmar, Hon'ble Advisor Minority Affairs & Sericulture Rs. 2,00,000
- 3) Chuchuyimpang Village Council Rs. 40,000
- 4) Longmisa Village Council Rs. 10,000
- 5) Ongpangkong Mungdang Rs. 10,000
- 6) Longsa Senso Telongjem Mokokchung Rs. 3,60,000
- 7) Longsa Senso Telongjem Alichen Rs. 20,400
- 8) Longsa Baptist Arogo Rs. 1,00,000
- 9) Shri. Supongmeren Jamir, Ex. MLA Rs. 50,000
- 10) Shri. Rongsennungba, Director Fishery & Aquatic Resources Rs. 50,000
- 11) Shri. Lipokonen, Dy. Director Agriculture Rs. 25,000
- 12) Special appreciation to the Mokokchung District Administration and concerned Departments for their cooperation and initiatives.

(TALICHUBA TATAR)

Chairman
Longsa Village Council

Russia-i Ukraine energy infrastructure nung tenük yoker amak

Kyiv, Monupii/May 08 (Agencies): Russia-i

Mongulbar aonung missiles aser drones 70 dak tema khalokja liasü, koba Ukraine indang energy infrastructure amakba nung tesashitiba rongnung ka alitsü.

Mongulbar aonung missiles aser drones ya Kyiv aser danga yimti trok nung aliba facilities nung khaloktsüba lir, ta ketdangsürtemi ashi. Industry raksatsütsü aser nüburtem achiajemtsü samaja par den meraratetsü teimla nung Moscow-i maneni Ukraine indang energy infrastructure nung tenük yoker.

Russia-i missiles 50 dak tema aser Iran nung yangluba "Shahed" drones - long-range unmanned vehicles with built-in warheads - 20 dak tema khaloktsü, ta ketdangsürtemi ashi.

Tir Volodymyr Zelenskyy-ia missile amshia amakba ya aitsü, koba agi nisung aliba ki aser railway network tema raksatsü ta ashir.

Lviv, Zaporizhzhia aser Ukraine south aser western tsütsü amak. Iba mapang arishi küm ti tetsür ka densema nisung asem yiru.

Iba sülen Bodhbarnep Ukraine kübok region toku nung power makai akum. Bodhbar nikongdang tashinung linük tesem ajungalen power cuts alitsü akok, ta Grid operator Ukrenergo ajanga tekumdangtsü shia lir.

"Tsükchir temi Ukraine nung nem tesangwa-a magütsüner," ta Energy Minister German Galushchenko-i ashi.

Mitkar asoshi nok-nü yangluba nung tetsükdaksü agütsütsü aser nüburtem tasü meiti kumdahtsütsü meranga Moscow-i Ukraine indang power plants amaker, ta

analysts temi ashir.

Victory in Europe Day amungtsü lia iba lendong ya ajurur. World War II nung Germany temai adoka bendanga agütsüba temaitsü May 8 nü iba anogomung ya amunger.

Russia nunga Soviet-i Nazi Germany madak takok anguba temaitsü May 9 nü Victory Day amunger. Ukraine nung taoba küm nungi iba anogomung ya May 8 nü amunger.

"World War II Day nung Nazism madak takok anguba aser bilemteta Nazi Putin-i Ukraine dak missile amshia amak," ta Tir Zelenskyy-i X post ka nung ashi.

Ukraine ya Western allies nungi nok-nü agütsütsü yongyasetata atar, aser par indang defence tashi ajema akumer ta ashir. Tawa United States aser European Union ajanga teyari tasen agütsütsü nangzüka lir.

Ajisüaka Kyiv-i maneni air defence systems tasen meshir, talisa US-i yangluba Patriot, koba agi drones aser missiles tem anüing nung lia raksatsür.

Washington-i Patriot systems tali aser ano National Advanced Surface-to-Air Missile Systems, mesüra NASAMS defence systems atema injang tali agütsütsü nangzüka lir.

Kasa mapang Russia-i Ukraine linük poksatsütsü meranger aser alilen sepaitemi anüdoklen tesemtem tali agiyonga aotsü meranger. Ano Ukraine indang air defences tashi agimadaksütsü mechi Moscow-i missiles aser drones tali-tali yoker ta ashir.

Russia-i raksatsür aliba yanglushitsü atema nüngdaka senotsü, osettsüset aser spare parts tem tatem leni arur aser tangbo Ukraine-i item oset kera meyangukteter.

Neeraj Chopra Federation Cup nung asayatsü jangjaogo

Monupii/May 8, 2024 (Agencies): Olympic aser world champion javelin throw asayar Neeraj Chopra, kum asem tsingda tang mezungbuba kidang asayatsü lir. Pa Bhubaneswar nung May 12 nungi 15 tashi asayatsü aliba National Federation Cup nung asayatsü jangjaogo.

Arishi kum 26 tain nungtugu asayar ya May 10 nü taküm atema mezungbuba Diamond League series nung shilem agiba sülen Doha nungi India-i arutsü imlar.

"@Neeraj_chopra1 aser Kishore Kumar Jena na Bhubaneswar nung May 12

nungi tenzuka asayatsü aliba domestic competition nung tokteptsü," ta Athletics Federation of India-i tweet asi.

Chopra indang coach Klaus Bartonietz-ia, pa Bhubaneswar asayamung nung shilem agitsü aliba indang PTI nem osang agütsüogo.

Kasa mapang nung arishi kum 28 tain Kishore Jena, shibai Hangzhou Asian Games nung silver medal ngua liasü, pa-a May 10 nü nungi tenzuka Doha Diamond League nung shilem agitsü.

Chopra iba domestic competition nung tatesa 2021 kum March 17 nü shilem agia

liasü, kong pai nület meter 87.80 tsüteta gold medal ngua liasü.

Iba sülen Chopra-i otsütsüsa Tokyo Olympics nung gold medal angu, 2022 kum Diamond League champion aser 2023 world champion akum aser China nung Asian Games nung gold medal ngua liasü.

Paisa, Diamond League individual legs asem kokogo aser 2022 World Championships nung silver medal ngua liasü.

Ajsüaka pai tang tashi nung nület meter 90 tashi tsüteta mali. Pai tang tashi nung nület talangtiba atsübaji meter 89.94 lir, koba pa atema personal best aser national record lir.

Geneva Open: Andy Murray nem wild card agütsüogo



Monupii/May 8, 2024 (Agencies): Grand Slam asemben tashi koker aliba asayar Andy Murray, iba ita asayatsü aliba Geneva Open nung asayatsü jangjaogo. Pa tetsung teloktep yiruba ajanga asayamung ishika nung shilem magiteti liasü.

Asayamung ayongertemi Bodhbarnü sangdong ka ajanga ashiba agi, parnoki arishi kum 36 tain asayar Murray nem iba clay-court asayamung atema wild-card entry agütsüogo. Iba asayamung ya May 18 nü tenzüksü.

Taoba ita Miami Open nung asaya ka nung shilem agiba mapang Murray tetsung tabelen teloktep nung ligaments yirua liasü. Ajisüaka pai surgery

magitsü atema telemtetba agia liasü.

Taoba mapang world No.1 asayar ya 2018 kum hip surgery agiba sülen asaya aika nungbo shilem magiteti arudar aser pa taküm tatabangbuba asayatsü akok ta shiogo.

Pai Wimbledon anaben tashi koka lir aser iba den Olympic nunga gold medal nguogo aser pa taküm Paris Olympics nunga Britain tenung nungi asayatsü imala atadar.

Geneva Open ya French Open atema warmup asayamung tongtibang ka lir. Murry-i iba asayamung nung final tonga asayaogo, ajisüaka 2017 kum semifinal tonga asayaba sülen tang tashi nung khen danga asaya mali.

Code of Conduct nung aibelenba atema Samson dang senchi achi



Monupii/May 8, 2024 (Agencies): Arun Jaitley Stadium nung Delhi Capitals run 20 agi makokba asaya nung IPL Code of Conduct nung aibelenba atema Rajasthan Royals captain Sanju Samson dang pa indang taa shilem 30 senchi chiogo.

Iba asaya nung asaya akoktsü atema run 222 arishiba mapang Samson-i run 86

yanglu. Pai kechi aibelen mena iba indang osang tejangja magütsü, saka over 16buba nung pai azükba ball ka Shai Hope-i boundary line anasa apuba dak sendakba nung Umpire tem mangatettep adokba atema asütsü ta bilemer.

Ball apuba mapang Hope indang tetsung boundary süngzü nung kongshi mekongshi mejangja. Umpire-i Samson aotsü sütsüba atema RR captain ya mepelai liasü. Pavilion-i meyipa tuguba mapang pai anener on-field umpire tem den sensaksema liasü.

"IPL's Code of Conduct, Article 2.8 kübok Samson-i Level 1 aibelen menaogo. Pai aibelen nangzükogo aser Match Referee-i temerenshi agütsüba agizükogo. Code of Conduct

Level 1 aibelen atema Match Referee-i kechi telemtetba agütsürdi aji tatabang asütsü," ta IPL sangdong ka ajanga metetdaksü.

IPL's Code of Conduct, Article 2.8 kübok Level 1 aibelen nung, Umpire-i telemtetba agiba magizükteti jashiba; asaya tenzükshitsü menodaksüba mesüra ground nungi menor tuguba; TV Umpire dang referral atema mepishiba aser Umpire telemtetba dak sendakba nung pa/la den mapang talang ka sensak asema densema lir.

Kasa mapang nung April 10 nü Jaipur nung Gujarat Titans den asayaba mapang RR puri atakzükja aliba mapang dang nungi tali asayaba atema Samson dang senchi sen lakh 12 chia liasü.

Siddharth Kaul Northamptonshire nung denogo



Monupii/May 8, 2024 (Agencies): English county club Northamptonshire-i taruba Division 2 asayatem atema Bodhbarnü India nunger pacer Siddharth Kaul den tenangzüktepba yangluogo. Parnok dang Division 2 nung jenjang pongububa nung lir. Arishi kum 33 tain Kaul ya Punjab nungi lir.

Iba maongka anguba sülen Kaul tang mezungbuba English domestic circuit nung shilem agitsü. Kaul-i first-class cricket asaya nung asaya 83 nung wicket 284 agia lir aser pa indang average 26.45 lir.

Pai tang tashi nung wicket pezü 13 ben aser wicket pongu 16 ben agia lir aser pa indang bowling figures tajungtibaji run 27 agütsür wicket trok agia aliba ya asütsü.

Kaul den tenangzüktepba yangluba indang jembiba

mapang Northamptonshire head coach John Sadler-i, "ni Northamptonshire nung densema atema kanga pelar aser team takok asoshi teyari agüja temaba jenjangi atutsü yongya atar. Asayaba mapang tensa balala ajangshia aotsü aser iba mapang ni teyari agütsütettsü ta tamang akar," ta ashi.

"Sid (Kaul) bowling nung tajangshiba aika bena aliba asayar ka lir. Pa first-class cricket aika asayaogo aser pa squad nung adenba sülen temelenshi bener arutsütsü yongya atadar. Pa India nung domestic season tembangogo, kong pai kanga junga asayaogo, anungji idakia kasaji asayatsü imlar," ta paisa shisem.

Hokolbarnü bonglang nung aliba Gloucestershire team den asayaba mapang Kaul-a asayatsü imlar.

NADA-i Bajrang Punia nem tenokdangba agütsü

Monupii/May 8, 2024 (Agencies): Tawa agiba trail mapang dope test atema sample magütsüba atema Bajrang Punia nem tenokdangba agütsüogo aser NADA-i ken o memetdaksüba atema Wrestling Federation of India (WFI) kanga mepelar aser ken o ya World Anti-Doping Agency (WADA) dangi abentsü sentong lir.

Bajrang nem National Anti Doping Agency (NADA)-i April 23 nü provisional suspension ka agütsü aser temerenshi nungi jenboa alitsü atema May 7 nü tashi nungbo telangzüba agütsütsü tetuyuba agütsüogo.

Bishkek nung Asian Olympic Qualifiers atema Tebur national team shimtsü asoshi Sonepat nung March 10 nü trails agia liasü aser Bajrang tamakok anguba sülen urine sample magütsüi asayaba tesem toktsür ao.

Pa nem tenokdangba agütsüba indang jembiba mapang Bajrang-i, ni NADA ketdangsurtem nem sample

maliasü. "Ni NADA ketdangsurtemi nem sample agütsütsü atema kodanga nongnanga maliasü. Ni dope test magi tsingda parnok dang kü sample agitsü atema expired kit bener aruba atema kechi jenjang agi, aji tama telangzüba agütsüdaksüner," ta Bajrang-i X nung zülutsü.

"Kü okatsür Vidush Singhania-i iba shiti atema telangzüba agütsütsü," ta paisa shisem. Bajrang-i telangzüba tapet magütsüra pa Paris Olympic Qualification nung shilem magitettsü.

Kasa mapang nung NADA-i tenokdangba agütsüba dak sendakba nung kecha osang magütsüba atema süngmangba WFI tir Sanjay Singh-i lemsatepa liasü.

"Bajrang nem tenokdangba agütsüba mapang NADA-i onok nem kecha osang magütsüba ya taoksatsüka. Ni NADA DG aser tanga ketdangsurtem den April 25 nü senden ka menogo, saka parnoki iba ken o indang kecha mebenok," ta Sanjay-i PTI

dang ashi.

"Parnoki clause requirements, long list (Paris Olympics atema) amala ken o ashishi aser tawa agiba Federation Cup indanga sensaksemogo, kong parnoki takokertem nungi sample bendentsü atema ketdangsurtem yoka liasü.

"Ajisüaka parnoki Bajrang Punia nem tenokdangba agütsüba indang kecha mashi. Ni tanep NADA ketdangsurtemi dangi call süogo saka parnoki kecha telangzüba magütsü. Ni NADA aser WADA dangi shiti zülutsü sentong lir," ta pai ashi.

Turkey nung May 9 nü nungi tenzuka asayatsü aliba World Qualifiers ya India nunger asoshi quota angutsü asoshi tatabangbuba maongka lir.

Tang tashi nung Olympics atema India tsür pezü dang qualify sür lir. Quota angurtem rongnung Vinesh Phogat (50kg), Antim Panghal (53kg), Anshu Malik (57kg) aser Reetika Hooda (76kg) nunger densema lir.

BILEMDANGANG

"Nisung ajak tagidak kakabo lir."